

條

麓

堂

集

條麓堂集卷之二十七

誌二

贈文林郎吏科都給事中守拙王公暨配封太孺人檀氏合葬墓誌銘

太原之王代爲著姓余同年友太僕卿王本道氏寔太原之忻州人沉毅守道不苟同流俗綽然有故家風焉初太僕官諫垣會天子推建儲恩父守拙公贈文林郎吏科都給事中母檀氏封太孺人時守拙公歿已三十年餘矣比太僕授今職太孺人就養宦邸以卒太僕乃卜兆忻西南五十里南張村之高原奉公夫婦柩合葬

焉遂手自爲狀走使蒲坂屬余誌而銘之余覽狀則慨然以興諗王氏慶澤所原蓋明德遠矣按狀公諱鎧字文濟別號守拙世家太原勝國時徙大同其遷于忻則自六世祖源始源生清舉人歷任浙江衢州府同知清生綱壽官綱生讓由歲貢兩任知縣終都司副斷事讓生堯臣舉人凡三任知縣綱公高祖讓曾祖堯臣祖也父聚奎以諸生入貲爲河南都司斷事母楊氏公生而清穎天性孝讓比知學即刻苦自勵夜分不寐深造實踐慨然以遠大自期嘗曰身修而後萬物可理督責話言皆末也居嘗悲憫時事究心于經濟欲以范文正之

義田爲睦族法呂氏之鄉約爲善俗法張橫渠井田之  
議爲治世法俱畫有成算較然可行無何以疾卒初公  
善唐舉許負之術每引鏡自照輒嘆曰吾有志當世恐  
年涉三十七八時不及措手爾至是果不爽云公循謹  
有禮與物無競歿之日州里老穉無不歎息泣下久之  
益見思配太孺人檀氏者同郡處士香女也處士娶于  
劉有女德是生大孺人寔克肖之年十八歸公公遊學  
四方有大父母父母在堂太孺人謹事之以孝聞性勤  
儉夙有痼疾少間即起治事布衣蔬食不喜纂組公歿  
室益窶太孺人上孝養老親歲時得佳果新菜必先獻

之下誨育諸孤勤勤懇懇俾無忘公遺訓故太僕問學  
夙成敷猷展采卒能究竟公志而休有譽聞則慈教然  
也公生于弘治壬戌六月三十日卒于嘉靖戊戌五月  
初八日得年三十有七太孺人生于弘治甲子正月二  
十二日卒于隆慶辛未九月廿一日得年六十有九子  
男三人伯治即太僕由癸丑進士歷任今官娶張氏卒  
贈孺人繼傅氏仲浩早卒季洛衣巾生娶彭氏文一人  
適庠生楊思芳孫男五茂松早卒茂材娶姜氏茂栢聘  
趙氏治出茂梧茂楨洛出孫女一字寧化衛應襲潘潤  
治出曾孫女一茂材出銘曰唯忻有王系出太原儒行

世修載德則蕃溫溫恭人潛心理窟居衆能謙在隱不  
忽既弘厥志廼不永年芳馨未沫襲于遺編貞媛孑孑  
矢心皎日茹荼字孤用競厥室宣勞于國貺慶于家神  
相有徵天道靡差撫撫南岡有崇者阡我銘不媿鐫在  
重泉

南京刑部廣西司郎中石溪陳公暨配朱宜人合葬墓  
誌銘

嘉靖乙丑余分校禮闈士得今宮諭陳君公望爲舉首  
則莆秋官大夫石溪先生子也先生以經學起家兩魁  
賢書而公望修其業以顯君合左券奕世科名之盛海

內所未有焉然先生謝事早人以不得究所施爲先生憾公望既貴再值大慶還先生官已復晉秩朝列大夫業足以顯先生而先生卒卒之日天子念公望經幄勞特推恩命有司爲先生致祭起塚如法而先生配朱宜人者先先生十年卒至是公望欲並啓其窆與先生合則介書余請銘公望初第時余獲觀先生子舍中恂恂古質一見知其長者心甚誼之故茲于公望之請不辭按狀先生諱言字宜昌別號石溪其徙居莆自唐清遠令公樞始宋有尚書公仁璧僕射公靖並爲名臣明興則叅政公觀以文學受知高皇帝嘗召備顧問未及大

用卒觀生鄉進士熊熊三傳爲祿祿生愧峯公宣則先生父也母爲黃孺人先生少穎精力學文譽藉甚初試有司不利氣嶽嶽不少挫嚮往益堅家故貧嘗授徒連州州帥與先生善有持重賄免先生白事者先生叱止之曰貧吾分也吾不能以此自蟻敢用蟻人其志操如此嘉靖丙午魁省試明年丁未再魁南宮遂成進士大宗伯泰和歐文莊公雅重之請于銓曹以先生爲邑令先生治泰和務伉直行一意有所興除不爲豪右骫法尤耻伺上官指巧爲迎合撫臺某獵賄所部陰屬公爲購書先生陽若弗喻也者而束書露餽之某大恚謀螫



先生先生因引疾謝不任請就教職得浙之湖州湖胡安定公故授徒處也先生至則申約束日切劘諸弟子諸弟子執筴請業前席爲滿間有跡弛不檢者輒蹠之堂下譙讓之衆爾然敬憚焉已稍遷國子博士積歲不調會肅皇帝欲爲李都尉立傳政府欲私某子甲太宰建安李公不從竟疏先生名以上於是先生得擢禮部儀制司主事傳李君異時都尉率貴倨驕其師先生獨抗顏自尊重務示都尉以禮時論以此高之越明年太宰李公以讒被譴政府修宿憾批根及先生謫倅郴州郴故僻公處之怡然無幾微見顏色而職事一切辦治

暇則進諸士講藝一如在湖州時會其年與事省閑得  
今武陵陳中允等六人皆知名士而郴士曾君選輩亦  
斌斌相繼起人多先生之鑒拔焉已擢知泰州值島夷  
訐江淮間幕府請餉甚急先生周爰調劑下不殫民力  
而軍興亦給州有疑獄所淹繫甚衆先生訊立出之衆  
驩感若更生尋轉南刑部員外郎晉郎中蓋駸駸達矣  
竟爲憾者所中用守泰州事坐謗免歸歸三年而公望  
登第先生喜曰吾志有托矣因營別墅一區名其室曰  
怡老堂時卧起吟咏其中泊如也蓋優游十五年而卒  
其卒也正衣冠應對賓客如常一言不及于亂人以爲

先生素養之徵先生性坦率於人無所德怨亦不以德怨望人而內行尤篤母黃孺人卒諸同產纍纍先生窮年講肄盡以所得資諸孤費無所私仕則又割奉予之者數矣晚而林居稍稍葺先壟拓祀田叙次家乘若干卷曰以此示子孫令無忘吾孝悌敦睦之行也嗟乎先生本用經術顯不習爲吏以故仕於世多齟齬然其用乃在人倫風教之間視卑卑施于名實末矣要以公望日執經侍人主紹明先生之家學則先生未可謂不過世也先生受室古田尉受敷女爲朱宜人宜人始歸先生時值姑既歿家落甚至不難脫簪珥以佐朝夕先生

既仕宜人齋用一無所加即屢起屢躋宜人亦不以其  
故自貶斯可以觀宜人已其它懿行具許太史誌中茲  
不具論先生生正德丁卯七月三十日卒萬曆丁丑七  
月二十七日得年七十有一宜人生正德乙巳閏九月  
十一日卒隆慶戊辰七月十三日得年六十子男二長  
經邦即公望左春坊左諭德宜人出娶林氏封孺人次  
經學側室何氏出聘蕭氏女五長適庠生黃必輔早卒  
次適庠生吳臬皆宜人出次適庠生余澄次許李治次  
許方應僖皆何出孫男一翰佐聘方氏孫女二長適林  
陞次許鄭淞皆公望出其合葬在某山之原銘曰人亦

有言寸長尺短枘鑿難投璣瑜不掩於惟先生含華咀  
實孔門文學漢庭經術蘇湖安定國子陽城生平宦蹟  
太半傳經白首爲郎孰云撫仕考槃自怡象賢有子後  
祿方將長算遽訕帝錫愍恩寵存逮歿誰其祔之曰惟  
泚媛隧而相見德音罔愆封斯樹斯納斯銘石垂千百  
年永奠玄宅

封承德郎戶部主事樂圃楊公暨配贈安人韓氏馮氏  
孫氏合塋墓誌銘

公諱鸞字時禎別號樂圃山東登州府寧海州文登縣  
人也祖興于永樂二年隸籍彭城衛遂家京師祖能父

遼母趙氏于弘治庚戌十一月初九日生公惇朴不華  
天性孝友幼失父每以不逮養爲痛事孀母曲盡色養  
能得其歡心撫弟鳳爲之授室立業庭內無間言性故  
侃直好與人之善良者游遇險詖人必規之以正甚爲  
姍黨所憚然至于調急恤困則又必盡力之所能及而  
後已獨不喜佛老曰善自人所當爲使爲福田脩行利  
之爾其達觀如此尤善教子長子運使君質敏授以儒  
業次子有心計則命之服賈故儒以甲第起家嗜三品  
而賈以勤勵殖其業鄉人榮之晚年謝人事治圃明農  
時吟咏以寄思方運使君任戶部主事時以三載績最

勅封公承德郎如其子官追運使君任兩淮公幾老壽  
矣形神康泰猶嘗奉養于宦所歸家甫三月無疾而卒  
時隆慶丁卯九月初八日也得年七十有八元配韓氏  
贈安人秉儉與勤克閨婦道生于弘治乙卯九月十三  
日卒于嘉靖甲午二月十七日得年四十繼馮氏未幾  
卒繼孫氏有女德撫二子如同出生于弘治辛酉九月  
二十三日卒于嘉靖辛酉閏五月二十二日得年六十  
有一公子男二人長君璽登嘉靖癸丑進士任兩淮都轉  
運使娶徐氏繼方氏王氏韓出次君璧娶李氏繼梁氏  
孫出孫男五從詩早卒從書順天府學生娶張氏從優

娶陳氏從儉從約俱幼孫女一御露曾孫男一惟屏曾  
孫女二公既歿運使君擇以是年十月十有三日啓韓  
安人暨馮氏孫氏竈合塋公于城南疙疸庄祖塋之次  
廼持鳳陽府同知田君汝耕所爲公夫婦狀屬其同年  
友史維氏銘之銘曰惟躬壽康惟子孫蕃昌作善會祥  
天道孔章茲惟玄堂既固且臧千斯年未央

奉政大夫陝西臨洮府同知歷山馮公墓誌銘

歷山馮公者諱舜田字歷夫其先河南龍門鎮人也十  
世祖諱俊者避宋金之亂始徙蒲其子惠爲金萬戶招  
討使四傳及公高祖諱祥者以有道稱曾祖盛景泰庚



平舉人秀府紀善祖從政成化丙午舉人河南汲縣知縣父紹鳳陽儒學訓導母王氏以弘治甲子十一月三十日生公公生有茂質祖汲縣公愛異之甫弱冠補郡庠弟子負甲午登山西鄉試上第甲辰春授河南汝陽縣知縣丁外艱服闋改授山東日照縣知縣陞臨洮府同知以卒公才器俊拔倜儻有大志初學舉子業即能爲驚人語大爲時輩所推長益矻矻不倦耽心藝林期大觀遠覽以自奮其奇故含毫所至無不綜貫經史兼獵百氏雲蒸霞蔚頃刻萬端雖制科式程遵其趨步而委蛇闔闢以泝洄于規矩之中者汪汪自如也視學使

者若西坡劉公中川陳公漫山曹公亟加獎許待以異  
等一時文譽赫然著聞從學之士有不遠千里至者公  
教人雖脫去凡陋不事雕鏤然亦必隨其才質之宜示  
以階級觀所謂白坡私訓者可考也其制政有局幹不  
耐爲俗吏態初令汝陽未數月以制歸其民至今思之  
比令日照仁其民一如汝陽者日照齊之東偏海濱廣  
斥人鮮生業公殫心圖之省刑役薄徵歛導樹藝立保  
甲于是流民復業者三千戶荒田墾者四萬餘頃桴鼓  
不鳴而四境訥訥然治矣又建奎山書院于邑之西南  
擇邑子弟之俊秀者以歲時居業其中又教民以瓦棺

易火葬俗爲一變焉公守已甚嚴居官凡十五年歷三任家無羨蓄其任臨洮也主督軍餉于蘭州每歲出納以億萬計公一以廉正蒞之盡剔納戶委吏之奸軍國稱便嘗承委覈甘肅儲峙有巨猾夜以兼金餽之公不受卒論如法諸所閱實甚衆時謂諸子曰若幸自立吾不能以墨佐若也其斷獄又以平反爲主多所全活如山東李仙桂扶風馬大海咸繪像祠之其制行純恪端雅事親孝待弟友處嫻黨睦與朋友篤布衣蔬食終其身不貳焉丙辰二月十七日以疾卒于靖虜衛之公署距其生得壽五十有三公凡五娶初配王氏繼王氏李

氏薛氏翟氏子男三人濂奉祀生負娶張氏繼范氏洛  
州學生娶楊氏洮早卒女一人適劉衍枝孫男二嗣科  
聘王氏濂出嗣第幼洛出孫女一幼公初配王氏余母  
之從姊妹也余幼往來外家每觀公心竊偉之後余表  
舅草窓景公謂余曰某與馮公曾同落秋試馮君喟然  
曰古人稱不朽者三丈夫當有取焉顧此區區者足念  
哉余聞而益偉之今觀公之自立班班者誠有味乎其  
言也公所著有蒲州新志馮氏家乘西行詩草白坡私  
訓及文集若干卷藏于家公之季弟澤甫者公教以舉  
子業與余同舉于鄉復同舉進士其爲余道公行甚習

今歲戊午子漁輦諏于某月某日將塋公程胡庄司訓  
公新塋兆次于洛爲狀以索銘于余公余素所畏也按  
狀又與澤甫之言合余宜銘公銘曰熙代崇文興庶職  
引規布矩示標式士執尺觚轉沿襲刻奇削異求繩墨  
吁嗟惟公擅孤識商彝周鼎恣遊息吮醲剗率窮探測  
博收廣運賈餘力褒衣緩帶行翕習蛟鸞兕吼群形匿  
從容尺寸靡差忒褰裳往就津浹惑位不酬才行道盡  
豐積寡受後必殖我銘玄堂歲千億

封奉政大夫河間府同知湖莊任公墓誌銘

公諱景玉字彥輝別號湖莊蒲之信昌里人也公叔子

子中今爲山東布政司叅議信昌在郡城東北四十里  
水土茂美俗安耕織百年亡絃誦聲公故有識量及叅  
議君生質甚穎公乃遣入郡城從師學里人姍焉公供  
督益力嘉靖壬子叅議君遂以周易領鄉薦山右列郡  
稱文學科第以蒲爲首然往往不出郡廛十餘里中諸  
鄉社去城遠者至百餘里士成名者蓋鮮即名成宦亦  
鮮達其褻然紆金紫位方岳則自叅議君始也故今諸  
鄉社士游郡庠者彬彬然視曩時不啻三倍咸自公啓  
之公既歿叅議君自上谷奔歸擇于某年某月某日葬  
公新趙村之東新阡乃匍匐手公狀屬其友人天官氏

維誌而銘焉禮也按狀公姓任氏先世臨晉綏化鄉人  
洪武初高祖直始籍于蒲曾祖恭祖榮父安母某氏公  
生而慷慨矜氣節乃中懷坦然始終不與物忤嫺黨有  
訟者質之公一言即兩釋退無異議其侃正足賴也力  
勤善治生中歲殖田產甚夥比叅議君貴初勅封公文  
林郎平谷知縣尋誥封公奉政大夫河間府同知凡再  
受貤典視其德澹素謙抑不異在寒素時而樂善好客  
扶貧濟弱唯其力所及則爲之絕不爲蓄貯計云公恬  
逸自適叅議君宰平谷時嘗一至宦邸後叅議君位益  
高且所歷多邊地公優游里居不復肯出素少疾病臨

殘猶健步田野間如常時歸呼諸子囑節飲慎交遂端  
坐瞑目而逝三日色不變見者異之公生成化丁未三  
月五日卒隆慶辛未十月廿一日得壽八十有五配趙  
氏繼配趙氏封孺人加封宜人子男五人勝娶郭氏旺  
娶薛氏先配趙氏出相娶馮氏彬即子中娶何氏封宜  
人官娶寇氏繼配趙宜人出女五人閭宗極張孟暘王  
棟薦進科李應申其婿也孫男十五昆娶趙氏勝出舜  
辰娶賈氏拱辰聘陳氏俱旺出湯辰娶趙氏武辰聘趙  
氏三僮俱相出翰辰娶展氏夢辰聘馮氏諫辰覲辰仰  
展侍辰俱彬出蚩子早殤書僮聘張氏新僮俱官出孫



女三一適王仲金一幼俱相出一適生貞李溥彬出曾  
孫男二曰穩子曰尚表曾孫女三曰麦兒曰果兒曰雪  
兒銘曰東原鬱鬱仁厚之里淳德是居葆貞胤祉曰貞  
惟何集善在躬太樸未斲春陽正融曰祉惟何冒在來  
裔桂籍起家瓜瓞衍世有撫斯域卜兆孔新公神歸焉  
萬禩永寧

徵仕郎中書舍人止一王公墓誌銘

公諱珂字仲鳴別號止一齋前魯山教諭贈徵仕郎中  
書舍人敬齋公之季子也年四十五以嘉靖己丑二月  
十六日卒于京師歸櫬于蒲葬于花園村祔敬齋公兆次

後二十八年爲嘉靖乙卯公配馮孺人卒次年十一月  
遂合葬焉公余先母王孺人之季父也于余爲外叔祖  
初公之葬也未有銘至是舅氏以狀徵銘于維維屬在  
諸孫且稔聞叔祖德美因不敢以不敏辭按狀蒲王氏  
蓋自滎河遷云王氏在隋唐間於河東最爲著姓滎河  
其裔也公始祖諱仲文者始徙蒲生子彥純傳公高祖  
秉信曾祖景嚴祖榮歷世載德及公父馨遂以儒學起  
家贈中書舍人敬齋公也母贈孺人張氏有壺德以成  
化乙巳七月十五日生公公幼寡啼笑愼威儀靜即沉  
沉冥坐若有思者比受學日誦百千言嚮往甚精悍甫

弱冠即沉酣經籍獵及百家千史之言性至孝愛而謹  
禮食飲蚤晏出入疾病進退唯諾悉中節文昕夕不能  
離顏色贈公初任鄧庠繼遷魯山公悉隨焉迨歸補蒲  
庠弟子負聲藉日益甚時諫大夫慶陽呂公以言事謫  
貳蒲雅敬重公延爲其猶子今京兆公顥子襄陽公顥  
友相與淬礪卒皆有聞于時是時贈公亦辭官里居公  
雖發憤志學廼心罔不在父母與諸兄孝養隆至晨昏  
省覲而後就學其克養益深專心濂洛日與易通太極  
圖出入爲伍久之有所得廼言曰誠吾身也反而歸之  
吾性也博而約之吾本然之天衷也窮而至之聲臭泯

然吾元化之混沌也故曰無極而太極也自是而陰陽  
而五行吾形色之造端也通貫本末周流造化誠其萬  
化祖乎生民初乎吾身吾性之終始也語意與圖說相  
表裏徵以子思之論則周原本造化以通其德公攄攬  
進脩而會諸誠其天人之辨與嗚呼微矣正德己卯舉  
于鄉辛巳卒業成均會毅皇帝厭代今帝踐天子位詔  
史館纂修先朝實錄百執事所需厥惟俊茂命大臣慎  
選以充公遂首膺薦爲試中書舍人與史事明年壬午  
贈公卒公大慟奔歸張孺人亦復羣病公痛往愛日孝  
益嚴癸未孺人卒治喪槨悉如禮時高陵呂太史判解

州呂素講性命因肅公與語懸然契解終日莫逆焉遂  
內交丙戌登進士以前史館勛授中書舍人典誥勅時  
天子勵意唐虞日御經筵諏治理輔臣祇惟聖學之重  
恪選吉人共事左右公寔與焉贈公及張孺人之恩命  
在是時也公居官清慎雖位望華顯而自奉甚廉雖資  
譽日隆而約身益卑遇親故特有禮他如視鄧友之疾  
而歸其喪解州人王氏之厄而卻其獻當大臣抱不測  
之譴而祖其行諸皆盛德事勤于官守隙即事于學無  
晝夜四方士多從游者又感養不逮親遇歲時生忌及  
諸俸入恩賚輒設奠慟哭焉嘗欲疏陳得失以報遭際

稿具矣會疾未上而卒公惠和外示藹藹可親其中毅然不爲非義撼動性澹素樂成人之善人有藏險習紛斥遠必力步履有矩矱寒暑雷風尺寸不忒其儼然矜莊之色雖千萬人可貌焉事諸兄愛敬以終始與人有恩義賑困窮不計有無公既歿里人溫清者貧甚售產得金持詣公主前拜謝而去曰王公數賙我不爲券廼其恩何可忘若他負雖日閱我顧吾力不支爾其盛德感人類如是也其學洽聞約取居敬存誠參伍神明尚友千古至于文辭書法亦皆端靖離俗可謂德藝洵美卓爾不群者矣狀云公始卒蓋皆有異徵云初張孺人

方身公則夢音樂幢蓋導捧一男子至其男子衣冠儒也貌瑩瑩如玉有神介之曰都帝詒汝警而語贈公贈公曰此大吉祥故公之生也贈公異焉及公將歿呂京兆公時爲比部郎則又夢公擁騶從道宣武門而去顧呂曰吾茲有稷山之命行蒞之矣嗚呼豈不異哉吾意天生哲人必賦以特異之氣則夫作爲道道固然與尋常不同其來去聚散靈變恍惚要有不可測者觀于公可見也公恒曰王氏自祖父積德百年天鑒悠矣今之盛寔惟申錫其信然與公所著詩文凡若干篇併語錄載家乘絳州志刻于絳配馮孺人內行甚備公禮之如

賓別有銘子男二人長崇雅已酉科山西解元有道而  
甚文公未究之緒將益光大未已也娶楊氏仲崇歟居  
商能家娶趙氏繼聘傅氏女一人聘崔登雲先卒余先  
母王孺人好稱述外家事訓勵諸子嘗曰季父事父母  
先意承志惟恐稍傷其心見人有患楚事若在身者愛  
諸兄弟之子一如己生蓋古人也始兄弟以家指滋衆  
業已析產矣時祖父母猶俱存季父曰其如甘旨何又  
有二三兄同遂復合爨終祖父母之身銘曰巖巖崑嶽  
膏玫是滋燁燁芝英靈囿勇之有赫降哲世德攸基匪  
粹涵貞玄羨未漓弱慧長通有執斯弘踴蹤經轍將神



藝叢顓斯探驪下彼雕蟲惟業之修惟德之茂立愛曰  
親因心則友內外孚仁闇明一守有衍厥藏亦孔之明  
載驤載躍于邦于京執紼石渠侍對天章篤慶方流未  
濬攸止渟曜胤祥胥維孫子撫撫崇阡氣亦完只有銘  
在石考于千祀

封修職郎國子監助教原泉任公暨配孺人李氏  
合葬墓誌銘

南康府太守任君汝專將合葬其父母乃平自爲狀匄  
匄而徵銘于余先是太守任國子助教之三年以德誼  
爲六館最上狀吏部在令甲當給勅進階太守上疏以

情陳詞甚懇天子感焉乃頒勅移封其父爲修職郎國  
子監助教于時原泉公方祿養京邸鶴髮蒼顏錦衣束  
帶拜受恩闕下見者豔之而且謂天道有知也公幼盍  
嘗攻舉子業有成緒矣乃不獲究其志棄而服賈士友  
惜焉比太守君弱冠領鄉薦咸訢訢謂屈伸乘除之應  
至是而公復身都其榮焉孰謂天難必哉公居鄉稱長  
者而太守君恂恂謹厚秩方面視其德不異塾庠時余  
既雅重公父子乃諾太守之請誌其世而銘之按狀公  
諱光溥字其原泉其別號也先世爲臨晉縣令東里人  
元至正間有敬之者爲河東驛丞占籍焉是爲蒲之始

祖公高祖彥中曾祖宣祖恩父敏鄉賓母楊氏公生而  
秀慧有立志幼治周易日夜孜孜用心甚苦以家累不  
獲卒業然志在是也故雖挾貲遠遊所至必以篇簡自  
隨遇先賢嘉言善行則手錄之久久成帙題之曰日用  
錄蓋若昔人自警編意其爲人謙抑謹畏表裏若一居  
家孝友尤嚴事鬼神享祀誠敬太守自知學讀書公教  
之悉有條貫誨督嚴密故成名甚早比太守服有官守  
自國學陞揚州府同知歷今職公悉隨之諄諄以謹操  
持重民命爲訓故太守所至以清慎見稱夫有所受之  
也配孺人李氏者處士迪女溫厚而慈具有婦德以孝

奉其翁姑以順睦其妯娌以勤儉相其夫以嚴正訓其  
子女足與公稱儷美云公生弘治辛酉正月十一日卒  
隆慶壬申八月五日享年七十有二孺人生弘治戊午  
三月十三日卒嘉靖乙卯十二月十三日享年五十有  
八子男一人賢即太守娶孫氏繼吳氏女西人長適隴  
州知州楊良材次適沈應泰次適山東道御史楊相皆  
孺人出其季字薛茂仁公繼配張氏出也孫男二長康  
聘李鴻紳女次慶聘舉人楊德耀女孫女一字太學生  
馮福慶銘曰有其匪之濬靡不通有其積之享靡不豐  
惟公夫婦居德攸同敷膏韜曜不顯于躬施及嗣人榮

祿具膺物情允穆神理可徵有崇者阡雙壁是封萬年  
孔固銘在玄宮

文林郎陝西鞏昌府禮縣知縣雲岩張公墓誌銘  
禮縣令雲岩張公既卒之明年其子進士雲翺將以某  
月日塋公某地乃介余同年友河南按察司僉事登山  
劉公狀公世行走使京邸以徵銘于余余自爲諸生與  
公交迄今三紀矣公器度疑遠豪邁自負睥睨流輩中  
謂功名可立致其一時同學士亦多讓之延竟不偶有  
司歛是聲實施于哲嗣將不謂天道哉公之自禮歸也  
余方山居公過蒲訪余廬城中而去比余聞而追公不

及也余時欲東遊傳岩陟吳山禮恭伯祠宇遵鳴條陌而北尋巫咸氏故居擬拉公偕往焉俄被徵命赴都不及行已乃聞公訃生死交情不及一訣別心盡然念之故于進士君之情不辭按狀公諱良貴字幼脩雲岩其別號也張氏世爲安邑著族公曾祖榮受易文清薛先生之門祖琢父訥封奉直大夫母白氏封宜人以兄南京戶部員外郎條岩公良知貴受貤典也公少穎敏攻苦問學志趣甚銳每督學使者及諸監司校藝輒置之高等凡八試于鄉不第貢入太學人咸以科第遺才惜之卒未春授陝西禮縣令地僻而繁百務悉懈弛乃極

力與舉之比暮年邑事駸駸改觀豪黠靡敢撓法民訟  
用簡癸酉公有疾致政歸其秋雲翺舉于鄉明年登進  
士授山東掖縣尹人咸謂公未竟之施于是乎在未幾  
公竟以前疾而卒萬曆甲戌十二月二日也距其生正  
德丙子三月十二日得壽五十有九公素以名節自勵  
于人無詭隨于物不輕取與其事親孝執喪以哀毀稱  
處兄弟友愛篤至直而不激矜而不爭迹其終始可列  
于君子之林也已公配馬氏有閭德生子男一進士雲  
翺娶賀氏繼李氏孫男二家蔭家禎孫女三俱幼銘曰  
安邑族望于今惟張迨公昆弟丕聞其光伯氏戡戡天

遼高驤曰叔曰季按武簪裳公奮其間競爽珪璋匪浸  
含芳再世而昌方興未央鬱鬱玄堂哲人永藏有銘不  
忘

封奉議大夫水亭王公墓誌銘

王氏爲世著姓凡海內郡國無論遠邇靡不有系派焉  
然惟居太原者爲族望漢晉而下聞人偉士燁然稱史  
籍者亦惟太原視諸郡國最蕃蓋于今爲烈云歲巳酉  
余應秋賦太原獲與今行省右丞王明輔氏同舉于鄉  
于時明輔未弱冠聲稱藉甚聞之太原人咸謂其大人  
水亭公善訓使然比明輔叅知陝藩公年七袞矣余以



文爲公壽後三年公歿明輔乃馳使燕京齎前守臨洮  
東岩唐君頤所爲公狀屬余誌而銘之按狀公諱尚智  
字哲夫先世交城人也其徙居陽曲寔自六世祖大用  
始曾祖延祖妣父鼎母梁氏公幼負奇氣嘗學舉業一  
試補諸生不遂即毅然棄去入貲爲按察司承差嘉靖  
戊戌謁選授順天府義豐驛丞地衝而近都久爲猾窟  
公至則悉以法網紀之猾大懟遂構公大察已又構公  
東廠皆見格猾乃解去肅皇帝南狩巡撫張公檄公同  
永平薛推官除館舍司供頓薛不勝懼竄避民舍中公  
獨力應之迄駕旋事稱辦張公下檄獎之有曰才堪重

委志不同人蓋奇之也時有胡總督者方貴幸諸求附  
麗者唯恐不得胡簡公自隨公詭以它故辭去俄而胡  
敗東人莫不賢智公壬寅陞真定府豐盈倉大使卑辰  
秩滿改直隸北峽關巡檢公局幹甚優歷任皆末秩所  
至不勞而理居多暇則闢塾延師汲汲以課子爲事明  
輔質賦警穎且南北師友多雋才故其學夙成戊申試  
補郡弟子負高等公聞之即投綬歸己酉明輔舉于鄉  
庚戌登進士颺歷南北裒然爲當代名卿今太原人言  
善教子者必曰王公云公襟度夷暢與物無忤當其意  
氣投洽雖少賤即成斷金好義樂施不問貲產太原嘗

大祿人多轉死公出粟賑之且瘞旅櫬之無歸者虜屢  
闖太原巡撫萬公下檄所司修會城樓櫓時公帑鮮羨  
蓄公首入五十金佐官費太原人遂競出所有萬公義  
之工竣聞于朝詔有司以羊酒勞公表其宅舍太原守  
臣慕公義延賓鄉飲士論宜之公性喜賓客座上常滿  
不即携壺榼過諸丈人故交遊遍閭閻歲時佳勝必宴  
遊諸別墅中覽秀濯清自謂不減南中焉公生弘治戊  
午十一月十九日卒隆慶庚午六月一日得壽七十有  
三  
明輔同知大名府時奏績最誥封公奉議大夫公初  
配郝氏贈宜人繼米氏封宜人子男二人道行四川布

政使即明輔娶楊氏封宜人米宜人出道明太學生娶  
陳氏繼馬氏側室汪出女一適生負張紹祖側室蔡出  
孫男一育才府學生曾孫男一女一俱幼葬域爲城東  
新都村之原塋期爲卒之年十二月九日銘曰惟汾滙  
精汪汪其度播潤伊邇含滋則富蓄極而通浩派東注  
宏施具達穰祉斯聚里閭歸仁林園寄趣黃髮徜徉素  
心靡慕哲範既往微風可邇玄堂有銘萬年孔固

宗室奉國將軍月泉墓誌銘

奉國將軍月泉者名聰潑高皇帝五世孫也高祖爲代  
簡王曾祖爲襄垣恭簡王祖爲鎮國將軍精一齋父爲

輔國將軍靜軒國典凡宗室子既生該王府具奏天子  
命宗人府製名編之王牒所以明系惇親禮至隆也宗  
室崇重賜名自恭簡始封於蒲世以行行在髫年即復  
各有別號踵習既久視別號若名焉語其名雖叔伯昆  
季弗相諳也故將軍稱月泉云靜軒凡五子將軍居其  
季其四兄曰清泉曰雙泉曰寒泉曰石泉各讀書善詩  
好從縉紳大夫游人稱四泉焉將軍篤信好禮有諸兄  
風靜軒既歿將軍時尚稚母荆夫人在堂左右服訓甚  
適其心朝夕承養不違其色荆夫人憐其孝謹嘗稱曰  
此兒後必昌家于時宗室祿入豐衍諸王孫競爲參忤

以聲色服馬自娛將軍獨退然若素士綜紀內外不妄  
用一錢及見老弱疲癯與有婚喪者賑賙援濟唯其力  
不恤也邇時縣官不足諸宗室祿益殺匱者不能供俯  
仰而將軍獨沛然有贏餘人謂荆夫人於是知子矣將  
軍雖制用甚廉而臨財能讓諸稱貸人有不能償者輒  
棄其券初析產有祖業蓮塘一區當以半付將軍推以  
予兄嘗卜塋域以價估付田主廼其人內損銖兩以瞞  
其衆衆弗忍遂大鬩將軍聞召語之曰金緣吾謬少耳  
毋庸爭也因訊給其數當是時徵將軍田人幾有死者  
蒲人大義之待族黨有施惠馭僮僕以恩居暇常延文

雅客彈碁清飲浩談疊疊終歲晏如也配王氏湖廣荊  
州府經歷惺庵公之女誥封淑人繼傳氏亦先將軍卒  
俱有內則子三人伯俊宋配丁氏仲俊擢嗣寒泉後配  
王氏季俊崇俱封鎮國中尉女一人封雲庄鄉君歸李  
邦彥封承務郎將軍生弘治乙丑七月二日卒嘉靖乙  
卯十二月十三日得壽五十有一卒之明年中尉兄弟  
將於十二月二十一日塋將軍王庄新阡持將軍猶子  
秋溪俊櫛所爲狀請銘于余余爲童子習句讀時與中  
尉兄弟同師在諸童中最契且日往來道將軍之門其  
習聞將軍之休舊矣凡狀所云云實然是宜銘銘曰居

貴思謙履盈不渝芟夷外華受此中腴猗維人兮與古  
爲徒

封朝列大夫松軒南公暨配肥城郡君合塋墓誌銘  
友人南君士薰將合塋其父母于條山原之新阡迺介  
其姊丈鳳陽府通判陳君爲狀以請銘于余南君父曰  
朝列大夫松軒公母曰肥城郡君松軒公先郡君十有  
四年而歿郡君罹坤變迄今亦且七閏士薰朝夕皇皇  
深惟吉地之卜歷久而始克合塋焉蓋其慎也余自志  
學獲與士薰游出入同館舍士薰韻度典秀操履甚清  
約不類國戚家子見者咸謂本于其父母內訓則然公



與郡君德美余故稔聞之凡陳君所述悉不誣乃次第其語爲誌而系之以銘誌曰南氏其先爲平陽之臨汾人公曾祖諱茂當國初時選戍于蒲遂爲蒲人祖晟父忠母某氏公諱九貢字賦之幼凝重不輒與群兒嬉戲比長選尚郡君誥封朝列大夫是時國戚方貴重公益持之以謙恂恂謹飭游情詩書間絕無態色驕氣事母夫人以孝聞好義樂施不貴苟得常宵行于道得遺金坐以待其主旦至歸焉蒲人甚多之好登眺山水時形諸繪事率穠至有精采蓋其趣寄夷曠若此至于治家教子其勤儉嚴慈悉有尺寸云郡君鎮國將軍成鉉仲

女襄垣王之孫女高皇帝五世孫也母羅氏其生也寔  
感異夢莊肅柔順鎮國鍾愛之及笄誥封肥城郡君歸  
于南恪執婦禮不以貴驕其夫家事姑誠孝備至食飲  
必親治乃進至于女紅紉組亦皆精絕處嫺黨和御臧  
獲恩凡女德咸備當郡君初歸時南氏故饒宗人祿給  
又豐且時郡君性喜施遇歲祲炊食以餉饑者多所全  
濟及大夫歿諸子幼遭家中窶郡君備歷艱楚無不豫  
色卒教訓子有成業可謂賢矣公生弘治甲寅十一月  
十七日卒嘉靖壬寅十一月二十五日得年四十有九  
郡君生弘治甲子三月二十一日卒嘉靖乙卯十二月

十三日得年五十有二子男四人風即士薰今更名金  
州學生娶王氏次某娶某氏次某某女六人長適鳳陽  
府通判陳永直次適國子監博士孟汝蒞三適宋彥隆  
四適州學生苟策五適總旗蘇濟六殤孫男一有慶習  
舉子業孫女一適李統俱金出銘曰惟德之恒惟義之  
貞豐否攸寧交愛相成粵惟哲人之行惠終令名撫彼  
條原有鬱佳城雙壁完歸永保爾後生

泰州同知愛山賈君暨配郭氏白氏合塋墓誌銘  
君諱鶴齡字仁夫別號愛山世爲河東臨晉縣人高祖  
珍曾祖茂祖表由邑庠貢入太學仕爲宿州判官父蘭

號疑南多積而能散閭黨歸其德母王氏君之將誕也  
母夢白鶴自空而下故命之曰鶴以志異也幼穎慧成  
童知學即晝夜自淬勵不倦補邑庠弟子負志趣甚遠  
會疑南公以家政之夥不禁勞瘁以君雅有心計命之  
綜理因入貲爲國子生君理家務十餘年貲產蒞殖好  
義樂施爲能恢廓疑南公之業而衍其仁澤其待族黨  
尤睦有田爲之耕無田授之貲幼而敏者教之塾人尤  
以是多之天性孝友嘗曰吾不能竭力供子職資父母  
之養以養父母敢不敬乎廼于溫膏定省之節懇懇致  
詳焉母有羸疾君百方延療遇晉陽蕭醫士者藥有驗

遂葺屋居之給田養之蕭因終身依君不去友愛二弟  
爲之延師取友訓迪甚力故昆季咸有聲邑中君筮仕  
爲鴻臚寺序班能于職陞本寺主簿遇穆廟覃登極恩  
贈其親如已官奏績得上考陞深州判官深地下故多  
水患監司廉君才令專理之君以舊堤卑薄不能任衝  
激乃增築重堤以捍之疏支河以派分其勢水患頓息  
陞泰州同知甫一載卒于官君有幹局兩任劇州皆以  
清勤見稱其爲人豁達樂易與人交出肺肝相示無纖  
介隱歿之日邑人聞者多嘆息泣下無論識不識也性  
敏多通凡釋道醫卜諸書類涉獵之獨于地理家最精

君生正德庚辰正月十四日卒隆慶壬申七月念三日  
得壽五十有三配郭氏前濟源尹士奇女生正德戊寅  
四月一日卒嘉靖丙申三月十六日得年一十有九繼  
配白氏有婦德鄉耆景春女生正德己卯三月六日卒  
嘉靖丁巳十二月十七日得年三十有九子男二人瑚  
邑庠生先卒娶謝氏太學生誥女璉邑庠生娶楊氏慶  
陽府通判時芳女孫男二勲瑚出煦璉出孫女三一字  
楊某二幼俱璉出璉將以萬曆癸酉塋君和村新塋遷  
郭氏白氏二柩合祔焉乃介姻友張君治化以狀靳余  
銘銘曰二巖之原泉甘土腴君代是居醇德靡渝世澤

弘敷穆穆里閭仕匪祿之徇榮是簪裾蘭茁盈區惟慶之餘玄堂考德貞石不誣

山東齊河縣主簿忠齋劉公墓誌銘

忠齋劉公簿齊河兢兢守官憲以吏幹爲監司所才檄視太和稅入倍贏檄督德州餉課辦稱最于是漕司空檄公西取諸閭版具次衛源以疾卒惟時伯子從仁方應恩貢入太學以文行稱于六館余延之家塾教諸子聞公訃從仁即毀踊西奔乃懇懇以公之誌銘見屬既抵解治葬有日以狀來申前請余獲交于公二紀餘矣公故丈人行乃情蘊樂易一見使人可親頃公謁選見

我燕京寓舍其容色風度宛與二紀前時不殊私念公  
且遐壽不意遽至此也乃愴焉誌而銘之以貽伯子按  
狀公諱登庸字士揚忠齋其別號云世爲解之字民坊  
人曾祖某祖水龍父節王府典膳母扈氏公兄弟凡四  
人公其仲也公幼聰慧業儒治書經補州學弟子貢涇  
野呂先生謫倅解梁立書院簡解士之雋者與之講析  
經傳公與焉久之援例入國學天性孝友事父母養致  
敬喪致哀爲宗族鄉黨所稱兄弟怡怡終始無間伯兄  
官鄆杜懼危疾公携醫星夜往視御以歸里人義之他  
如伯父某無嗣則養伯母如其母煥哺從兄之貧者浹



爲收葬之聯綴遠族歲時合祝而通其慶吊皆孝友所  
推也氣度寬裕不與物較尺寸而獨慎于取友不妄交  
居常訓子姪曰吾世以耕讀爲業若輩須努力爲好人  
毋爲族里所訾常以邵堯夫孝弟吟及普明兄弟同居  
併婁師德丙吉諸厚德事大書于壁使朝夕省觀有所  
感興中歲頗以場圃自適蒔疏殖花以彈琴讀書其中  
暇則治諸方藥用濟貧病之不能自資者其致足稱也  
公生于正德丁卯二月二十七日卒于隆慶庚午四月  
二十二日得年六十有四配呂氏繼暢氏子男四人伯  
從仁恩貢生娶李氏呂出仲體仁州庠生娶史氏叔行

仁娶王氏季得仁女一人字照磨閭應時子墳俱暢出  
孫男四某某從仁出某某體仁出孫女一適庠生孫緒  
銘曰於惟公睟厥容入孝友出信恭政小試道有終嗣  
振振餘慶鍾條之麓氣鬱葱安且吉啓玄宮萬斯年永  
無窮

山西潞安府儒學教授前山東沂水縣知縣鳳岡  
孫公墓誌銘

鳳岡孫公既塋之明年其季子太原府推官化龍以狀  
來徵余爲誌銘將以追而納諸羨道化龍余前丁卯典  
試順天時所舉士也既敏而雅余一見異之詢知爲儒

家子將謂訓習則然茲覽狀述則又知世澤濔濔久矣  
宜其達也按狀公諱光祖字紹先別號鳳岡世爲真定  
之獲鹿人曾祖茂山東即墨縣主簿祖璨浙江紹興府  
照磨父謙晉府典膳母蕭氏公生而穎敏弱冠補邑庠  
弟子員篤志力學終始不懈遂以文學著聲庠序中方  
少司馬永康王公以兵憲駐鹿邑時妙簡俊異朝夕與  
談經史公與焉然困于數奇累舉竟不第嘉靖庚戌貢  
入太學甲子選授山東沂水知縣沂土壻賦重民多亡  
入它邑公設法招徠之歲中復業者相繼均徭役慎刑  
罰民甚宜之然性故勁直自遂不能作世俗俯仰態

利獎當興除者輒毅然任之其諸監司隸人以事至邑者又數以法絕其肆由是監司滋不悅明年遂罷邑事又明年改山西潞安府學教授持身立教諸生復甚宜焉居二載告歸放情山水以琴書自娛絕不爲子孫產業計隆慶己巳七月十六日以疾卒距其生弘治乙丑三月十三日得年六十五歲配趙氏生子男四應龍乙卯武舉娶姜氏從龍武生娶高氏攀龍庠生娶高氏其季則化龍也登戊辰進士授山西太原府推官娶崔氏女二長適庠生周九思次適知印王無私孫男七修業娶姜氏續業娶胡氏衍業娶杜氏廣業新業振業俱幼

一在襁褓孫女十一長適高嘉瑞次適胡蛟次適傅訓  
餘未字公平生方介不苟合與人無城府不爲飾言性  
不宿怨邑人聶姓者嘗與公有郤會以誣繫獄公爲白  
其寃其教子嚴而有法故諸子皆克肖公既歿應龍等  
以其年十一月十五日塋公邑西北奇山之陽祖塋銘  
曰曷績厥學廼寃未洪亦裕厥修廼享未豐譬彼澄淵  
匪極則通餘慶載鍾博碩顯融萬年考德銘在玄宮

永壽縣教諭西郭崔公墓誌銘

西郭崔公者諱朝佐字某其先屯留之崔明岡里人也  
六世祖諱彥美者當國朝洪武初爲潞郡掾因占潞籍

迄今子孫家焉彥美生仕岩公高祖也曾祖曰景春祖  
曰鎮父曰友能以耆壽得官配韓氏繼配路氏公路出  
也幼警異伉伉自負不與群兒類家故力田公則以明  
經自奮弱冠爲郡諸生專精易學旁貫諸子史切劘師  
友日孳孳無替夕是用沉涵浩博遂有所詣一時學者  
爭師事之焉嘉靖丁酉有司上歲計貢入禮部戊戌春  
遂謁選授山東陵縣訓導以母老爲祿仕也而路孺人  
憚道里雅不欲行公乃單車之任留妻子侍養于家時  
寄俸給供菽水每歲時佳勝寮友讌集輒憶母而泣陵  
尹沈君以終身慕稱之庚子丁路孺人憂哀毀有加而

莖祭以禮既襄事廼率鄉人修藍田呂氏鄉約崇儉禁  
靡恤窮濟匱于是習俗一變環所居雍容如也服闋補  
直隸慶雲縣訓導丁未陞陝西永壽縣教諭公凡教三  
邑所至必陳條式明嚮導崇獎德行嚴督課業以成就  
人才爲己任每謂士須自重庶他日可以有爲故常以  
節義爲訓首約士不干有司諸被其教者咸有所興焉  
在永壽凡幾年會仲子宗舜殤歿慨然請老而歸視學  
使者嘉其節固留不可因移檄原籍旌之公幼志于學  
長益肆力不懈砥躬礪行靡有愆言勤儉仁嫻始終一  
節其可謂惇篤尚行之君子矣深造大積不旣厥用而

流慶衍訓遺于後人廼伯子宗堯癸丑登進士第人咸  
謂爲公未究之澤云公生于成化丙午七月廿七日卒  
于嘉靖辛酉四月初九日得壽七十有五初配王氏事  
姑以孝聞婉孌惠和婦道母儀兩適其可生于成化某  
年某月某日卒于嘉靖丙戌某月某日得年若干繼原  
氏子男三人長宗堯任潼川州知州先公十二日卒于  
官娶張氏繼李氏韓氏次宗孔郡庠生娶李氏女三人  
長適庠生張某次適原堂次適某孫男二人紹勲繩勲  
孫女二人皆宗堯出公卒之歲宗孔卜以九月九日葬  
公村西祖塋之次介公弟大名府貳守大德狀公行屬



銘于維貳守故受業先生之門及公伯子潼川君與維  
皆癸丑同榜士也潼川君既登第以直道忤北軍貴人  
坎壈而歿蓋得于公節義之教者故維將銘公念潼川君  
而惻然也銘曰引繩蹈軌瞻容印止孰民之不化而正  
斯士熙熙春陽幽蘭布芳奚遠之不懷而仁斯鄉鳳戢  
修羽靡宣厥美翺翺章華振于孫子不顯其光載篤其  
慶叶萬年考德銘在玄堂

條麓堂集卷之二十八

誌三

湛泉王公墓誌銘

代作

嘉靖甲子十一月壬戌吾友前吏部文選司郎中鄉寧王公卒于家距其生正德戊辰七月辛丑得年才五十七爾初公爲文選郎也善善惡惡上恬絀倖務存國家憲章以直行已志嘗撮銓部之務其要且重者條上四事將舉數十年沿習訛陋芟刈掃除之意至銳也會權貴人有以私干者公上疏頌言其事幾陷于危法賴天子聖明得解職去公既去權貴人勢益張銓曹滋不得

盡行其職者且二十年廼已故海內士無不喁喁思念公者而公今乃不起耶悲哉余與公游最久相知爲深公志趣高邁耿介自信當其心之所是毅然必遂不可怵以利害苟義有弗安即若攢芒在身湏臾弗寧處也襟期有所契會即其人在千里必通好焉使所遇非其所與雖經日侍側言色終亦不在其人以是獲時之令名然亦以此不達于世其大致然也公諱與齡字受甫別號湛泉世山西鄉寧人曾祖睿祖文封彰德府通判父爵薊州知州以公貴封吏部稽勲司員外郎母李氏封宜人公幼嘗受學少宗伯後渠崔先生之門嘉靖戊

子舉于鄉己丑與兄培齡同登進士授蘇州府推官平  
反有聲陞戶部湖廣司主事調吏部驗封歷稽勲員外  
郎告歸侍遂丁父憂起復補稽勲員外郎會崔先生卒  
乃上疏送母旋治先生喪事還朝晉文選郎中無何歸  
時嘉靖癸卯秋也方公之歸海內士無聞識不識率望  
旦夕起公而所忤權貴人當柄久竟不果起公居鄉深  
自韜匿足迹絕不及公府闢軒儲書藝圃蒔蔬浩然若  
未嘗櫻世慮者事母宜人備極色養篤厚天倫極卹困  
乏家庭宗族鄉黨之間訢訢如也臨汾西磐張公每以  
公之忠清諒直勉鄉之髦士三原谿田馬公爲平陽四

賢吟列公于恭介陶公忠定韓公及西磐公之間其爲  
前輩所推許如此公配高氏封宜人子男二人整邑學  
生敕早卒孫女二人公既歿整以公遺命走使持公門  
人西安府同知李愚所爲狀求余銘余故深知公者不  
虞公之遽至此也乃哭諸寢門之外而銘之銘曰直道  
任心矢忠徇國蟬蛻囂埃介然不惑雖身之抑而志可  
則彼汾一曲清流湜湜靜言觀魚不用九罭祥麟所遊  
山澤生色君子攸止習俗承德徽儀云亡清風不熄我  
銘在斯過者其式

代府典膳守庵張公暨配孺人曲氏合塋墓誌銘

守庵張公者諱轍字宗道有道人也始余從遊臨川皆  
所陳先生之門居業河東書院獲識公之元子子翔納  
交焉因得拜公于堂余初見子翔矩步規言矯矯然若  
雲鶴之處群也廼其氣夷然無矜飾異之已而覲公方  
毅閑深淵淵莫測其際類傳記所稱隱君子者益以知  
子翔之篤行有自也比往來公家益熟習見公之行事  
而聆其論議公執義甚堅遵所知以爲行與人無僞言  
其教子甚嚴當余識公時子翔蓋已三十餘偉自表立  
卓然有聲山右矣而公訓之義方如嚴師之臨嬰孺其  
威儀出入未嘗不肅也隨事規誨未嘗不切也雖余見

公公未嘗不降顏溫接然每及公門心凜然如近師保  
焉其方毅可憚也後余與子翔先後領鄉薦不及拜公  
者且十年今歲戊午公以疾卒于正寢卒之越月子翔  
衰絰走百里手公及公配孺人曲氏之行實慟哭而徵  
銘于余夫公之有道宜銘余爲通家子知公悉余宜銘  
公因不敢辭銘併誌其世按張氏先居倚氏國初時公  
五世祖從者始徙安邑之聖惠鎮即今運城是爲始祖  
從生公高祖斌當文皇北狩時代兄戍濱百死而歸運  
人至今稱焉曾祖祐封監察御史加贈通議大夫太常  
寺卿祖珣父華母王氏張氏世有隱德陰施至公益篤

公性純孝器宇凝重幼以庭訓事儒業有成績矣父亡  
遂奪志事母及繼祖母王氏視食朝夕寒暑必謹叔父  
諱獲者業儒公以父禮事之獲貢入京道良鄉而卒公  
奔赴負其襯以歸歸而恤其孤寡叔母石氏無養則以  
已田資之其女四人則爲備禮歸之比石氏卒則又悉  
以奩篋散其女而獨治其喪塋之祔之可謂篤厚于人  
倫者也性好讀書每涉閱典籍必欲終卷故多見聞古  
今事物尤邃於奇門遁書嘗曰是書有資于日用甚切  
不可以術廢也工書法論字體點畫輕重之義曲中肯  
綮嘗有述曰吾孤不能拓先產然守業未敢墜吾無卓



行然守身無大過吾無勢分加人然守法人亦無侮予者唯教子頗有成吾平生所自守者唯此耳因號其庵曰守庵其自信之篤如此曲孺人太學生閻之女鎮江府同知獻之孫慶府長史新之曾孫也曲爲河東著姓孺人母張氏者都御史張公岫之女也閻範甚修教子女有法孺人幼聰慧閑于母教有淑靜之德女紅中饋精絕冠一時年十六歸于公相敬禮如賓奉姑及繼祖姑孝謹無怠公寡兄弟獨一妹公母王孺人鍾愛之孺人承姑意奉之惟謹凡置簪珥衣服必畢陳姑所俟小姑取然後收其餘于是大得王孺人之歡心後王孺人

老而患癱不能步履孺人依侍不離頃刻疾痛瘁疴先  
意承志鄉黨稱孝焉公生于成化乙巳五月十七日卒  
于嘉靖戊午閏七月二十三日得壽七十有三初援例  
爲代府典膳以母老不就役終養于家孺人生于弘治  
庚午十月十四日卒于嘉靖戊戌二月二十八日得壽  
五十子男二人長集壬子科舉人娶某氏繼石氏余友  
子翔也次集安邑縣學生娶劉氏孫女一瑩姐子翔出  
字常氏塋地在城西姚暹渠北岸勅建祖塋之次塋期  
爲今歲戊午十一月十一日銘曰張氏之昌寔始太常  
惟公似之惟德之行展矣淑人葆和靈族天作之合允

也雙玉承烈爾前衍休爾後碩人振穎國華攸茂支龍  
之原承帝之兆水浴瑤華山翔朱鳥青鳥告祥日月叶  
吉于萬斯年永安玄室

儒官王公世周暨配孺人張氏合塋墓誌銘

儒官王公世周張孺人者余之妻祖父母也公諱冕有  
道而早卒遺孤二人其伯余之妻父也初公歿二子藐  
焉始齟公既鮮兄弟且家無應門之僕而公之母姬孺  
人在堂張孺人奉姑撫孤誓志不二時有匪人覲其弱  
者曰吾令若貨而產吾立貨若輶轢百端孺人卒不爲  
動命伯子服賈曰孤而無助將門戶是賴授仲子以儒

業曰良人有志而未成其負荷在是也比長俱爲授室  
後伯子克拓前產而仲子以明經爲諸生卒立厥家云  
余妻幼失母孺人憐而鞠之恩愛懇至迨將笄爲之筮  
婿諏之仲子而以歸余余因得諗孺人之淑懿孺人天  
性慈孝而中有矩矱隱然丈夫之度理事有執當其意  
慮既定雖衆議叢沓畧不搖惑故克有成績其治家精  
敏庭宇楚楚閭內無譁而九祭祀賓客必極豐腆其自  
奉又以儉素蓋班班可稱也嘉靖乙卯蒲地大震孺人  
及仲子俱遇變卒貞行未旌嗣孫未立砥礪終身旋罹  
異數嗚呼其可痛也夫先是公歿塋程胡原祖塋今歲

戊午妻父營新城祖塋之北擇三月二十四日遷公柩  
及孺人合窆焉余遂爲志其世而係之以銘其世曰王  
氏自宋元爲河中人諱思明者國初占籍蒲大通廟公  
曾祖仲爵祖琰福建興化府經歷父縉有耆德爲鄉飲  
賓母姬氏孺人父越母王氏公生于成化戊申七月三  
十日卯時卒于正德丙子四月二十二日戌時得年二  
十有九初爲學生後授儒官孺人生于弘治己酉八月  
十七日子時卒嘉靖乙卯十二月十三日子時得壽六  
十有七子男二人恩娶馮氏繼崔氏楊氏楊氏張氏志  
州學生娶張氏繼趙氏孫女二人長即余妻其幼者方

二歲蓋公歿三十餘年而余始爲公之孫婿又十年而孺人歿故余之述孺人也獨詳其銘曰夫義而方婦順而莊儀休肯哲也春華未榮秋飈驟驚中道而烈也矢志從一陳情皎日栢舟競烈也有姑而老有子而抱形影維予也姑耄且康子壯既昌九京是悅也玄首載縞百年永保與子同穴也有撫北原負艮抱坤生氣之結也雙瓊永妥百福是荷來祉斯擷也我銘貞石納之幽宅萬載以爲楬也

儒官東泉王公暨配孺人馮氏崔氏楊氏合塋墓

誌銘

公諱恩字希榮別號東泉世爲蒲之大通廩人高祖仲  
爵曾祖琰福建興化府經歷祖縉鄉賓父冕儒官母張  
氏公生正德己巳十二月二十一日卒嘉靖己未十二  
月四日得年五十有一馮孺人者公元配也父滄母張  
氏生正德癸酉三月十五日卒嘉靖癸巳二月十四日  
得年二十有一公幼失怙怙据立門戶遊貨南北足跡  
半天下初歲業嘗中耗厲志經營用能復殖其產尤慎  
于出納終其身未嘗有錙銖濫費盖天性然也事母至  
孝與人有情愛故聞公歿嫻識閭黨無不嗟悼焉公初  
配馮孺人淑慎莊肅是生一女適左春坊諭德張四維

封宜人繼九一娶于崔再娶于楊間有所出皆不育又  
皆先公歿最後娶張氏當公歿時有一子一女未幾亦  
皆夭張孺人年甚少泣涕守柩門扃甚肅蒲人咸高其  
義而悲之今歲隆慶戊辰公歿且十載矣婿張四維始  
獲請告歸為公治殯事卜于十二月乙酉葬公于穀嶺  
原程胡庄祖塋啓馮孺人及崔氏二楊氏之窀而遷祔  
焉初公之葬其父母及其弟東溪君也則卜兆祖塋北  
立新城至是仍遷之祖塋併公墳悉甃之王氏故河中  
茂族塋建自勝國時塚纍纍甚衆乃今子姓彫斃群從  
中遂無可立後者蒸嘗之托俟異日擇能任者議之公



初撫一子曰成今與張孺人相依為命者也銘曰惟王  
族殷以蕃百斯年河之間丁中否支用單嗟惟公德則  
豐配惟淑夙隱幽後宜昌邁斯窮相壯原撫厥土次昆  
季從宗祖固斯藏永終古公有女女有孫考于世澤則  
存徵玄石婿之文

毅齋沈公暨配孺人張氏合葬墓誌銘

毅齋公者姓沈氏名廷珩字邦良余祖姑丈也初葬蒲  
姚溫村祖塋嘉靖辛卯遷蒲程胡莊新阡少叅方山劉  
公為之銘誌迄乙卯余祖姑卒將合祔焉值地變不果  
越二歲戊午余舅憲副鑑川王公同余父相表伯江

地祖塋之西條山之巖洧期閏七月二十一日奉公夫婦合葬焉公歿至是幾五十年凡三葬而始克定兆堂孫舉人應坤狀其世行屬內孫張四維撰銘于墓按沈氏其先河中永樂鎮人也勝國時諱孝先者仕為參軍提領避亂猗氏明興子恭道遂占籍焉恭道子政仍還蒲迄今沈氏為兩地著姓云公曾祖浩祖鑑俱隱德父明字彥章補猗氏弟子負受學文清薛先生之門造詣甚正配王氏于成化戊子六月二十七日生公公幼有至性四歲失怙事母以篤孝稱事諸兄克恭弟道伯兄元祥學有聲悉心供事冀成父志元祥中道殞公痛甚

撫其遺孤不啻所生與人交誠篤不激詭人無不愛且  
敬者幼知學進取甚銳後以家務服賈所欲不存也故  
南帆揚越西歷關隴乘時廢居用能拓產殖家而所至  
必携小學通鑑時誦習之遇事輒有援證工楷書喜為  
近體詩盈于囊篋其嗜好然也歲癸酉九月二十七日  
卒于廣陵距其生得年四十有六配張氏余祖姑也初  
余曾祖孟儒府君有二女一男男即余祖守正公及季  
祖姑歸薛氏者俱早亡余皆不及見而獨獲見祖姑祖  
姑溫淑貞朴得于天性而余曾祖母雷孺人孀居治家  
教子女甚嚴故祖姑之婦道母儀綽有矩矱孝姑和如

嫗育臧獲上下愛戴焉嫗居四十餘年躬服儉素謝絕鉛華紉澣茹糗綜理詳密用能不廢教齋公之家而成立其孤晚歲耳目聰明神志清爽七十餘猶手自纂繡以教諸孫女紅余幼往來祖姑家未嘗見其疾言愠色可謂貞靜以全天倪者已祖姑生成化丙申三月初一日卒嘉靖乙卯十月三十日得壽八十子男二人長江娶王氏封刑部主事素庵公之女余母之伯姊也次四早卒冥婚劉氏贈兵部主事虛齋公之女女二人長適吳穉次適郭弘毅孫女一人適太學生張志道外孫男二人吳周郭積魯外孫男二人張嘉蘊嘉猷子姓僉僉

然盛矣而嗣孫未立吁可傷也銘曰儒行商名湖海之  
英武訓宜家彤管之華伉茲雙秀宜爾蕃茂豈豐于躬  
而齋于後條山之趾負丁抱癸衍慶鍾祥自今伊始

儒官晉峯張公墓誌銘

公諱治化字子升別號晉峯姓張氏先世自唐宋時居  
州東三十里條山下李店莊以榨油世其業勝國時諱  
仕應者徙居州古城大通廂國初遂占籍焉迄今二百  
餘年子孫族居其所不易故州人稱故家者必曰油張  
氏云公高祖瑛曾祖紳祖懷父邦畿母趙氏以正德甲  
戌正月二十一日生公幼負奇氣弱冠游群庠習舉子

其喜爲不經人道語諸當道有識奇者間能稱之然用  
是亦不能合有司幅度竟不偶再世業儒生計甚薄而  
公事親最孝至貨常產供甘旨以承晨夕歡雖終歲屢  
空意晏如也性方正有威重意致殷懇善啓誘後學臨  
晉賈氏者延公爲塾師賈故以力田致饒貲雄數邑諸  
子習公教皆循循儒者以行義稱于鄉今其家奕奕起  
爲儒門矣公與人無城府語即吐心久與居則情款益  
篤處宗族鄉黨一以直諒無論親疎賢不肖咸無間言  
者余蚤與公相知迨附姻聯末益投契分昔歲公薄遊  
京國爲余留訓諸子焉邇歲里居因與公周旋不置公

風儀踈宕世故不以入其懷其神氣毅然即壯夫有不  
逮者日余寓山房公以札諭云偶滯下豈有良餌爲已  
此疾耶余意暑月常疾耳其夕回舍將訊之則聞公歿  
時萬曆甲戌七月十五日也悲哉悲哉晨寓札于余時  
其語意筆蹟與平時無異豈自知其夕不起耶公家世  
多壽而公賦質且厚即弗期願乃耄耄可希也顧得年  
僅六十有一而止耶嗟嗟人之生世可繄見也已公配  
龍氏生子男二人長簡娶王氏次策女一人適楊良知  
公塋有日余乃誌公世行鑑諸羨道之石用識久遠塋  
域在義嶺東南原大澗之陽公塋二親所經營新阡也

銘曰胡材之良而遇則邇胡氣之龐而壽罔延惟身之  
否延終窶艱惟心之亨延恒泰然造物豈偏可問者天  
有瞻崇阡公神歸焉昭德在石不媿永年

壽官郇岡沈公墓誌銘

隆慶壬申十一月十一日表伯郇岡公卒距其生弘治  
甲寅八月某日得年七十有九此在人間世稱上壽矣  
然有可悲者初余祖姑歸沈氏生二子而公爲長其季  
未室而亡公淳固敦龐亦既永于年矣乃復竟鮮胤嗣  
傷哉天道真不可知也公從子應豐者早孤公撫育成  
立與同居處應豐亦曲盡孝敬不啻父子然當公疾篤



時應豐適自遠歸居其喪余舅官保鑑川公暨家大人  
爲之經紀其後事甚備葬有日余乃誌公世行納諸羨  
道用存之不朽云公諱江字東潮姓沈氏沈氏故爲河  
中永樂人公八世祖諱孝先者仕元爲叅軍提領徙猗  
氏子恭道遂占籍焉恭道子有曰政者還蒲居籍仍係  
猗氏猗氏古郇墟故公號郇岡志不忘也高祖浩曾祖  
鑑祖明猗庠生父廷珍號毅齋母張氏余祖姑也公天  
性夷曠雖牽車服賈不切切然計贏縮當年盛志銳携  
巨貲遊關隴揚越間徃徃牟大利輒散去不復訾省求  
年生理漸耗或終歲屢空晏然居之亦未嘗一日戚戚

于懷殆古之所謂能保其天倪者性敏多記憶弱冠失  
怙不得終志于學而好涉閱舟車所至必携短帙自隨  
爲能多通于方技小說家之言其筭數有聲于塵井間  
然人所亟稱者則周易課占言禍福無不立應由其衷  
宇寧定不爲物擾能與鬼神通爾蒲俗婚媾論門輩公  
最能道其詳若遠若近子姓族系旁通傳衍歷歷紀分  
而階列之且好稱述郡中前輩事實及異時風俗厚道  
疊疊可聽故余每聞公言輒慨嘆思慕雖累日若不足  
也公配王氏贈太子太保兵部尚書素庵公之女先妣  
淑人之伯姊也先公十年卒閩行周善具見舅氏鑑川

公誌中繼某氏女一人適國子生張志道外孫男三人  
嘉蘊州學生嘉猷嘉言塋之域爲條山東麓新阡塋之  
期爲萬曆癸酉二月二十一日銘曰吁嗟伯翁身今是  
居而心與古爲徒賈惟其業而不與利謀豐殖若虛終  
窶自如明絜物策而幽發神樞既壽且康優游化區胡  
靈根之厚而芳蔭未敷中條之陰厥壤孔腴玄堂永寧  
萬禩不渝

義官南橋韓公暨配薛孺人合塋墓誌銘

友人韓君伯通將合塋其父母南橋君薛孺人新兆既  
卜廼手狀行實徵余銘于千里余覽狀則泫然而悲不

知涕之無從也嗟乎立孤之難劇于死節在昔烈丈夫  
謂且然矣矧以閨閣之孱姿遭不天之愍會而能矢信  
于中植義于後是雖其身之子弱而能立猶足難焉而  
况育子姓以竟厥志者乎可不謂烈與伯通者蓋南橋  
公之嗣子也南橋公歿既數歲而伯通始生薛孺人取  
而鞠之備歷荼苦廿年餘矣既有成績而養不待焉茲  
可不悲與余爲弟子負也則與伯通友因諗孺人之詳  
而亦槩公之爲人故將銘公夫婦而重之以悲按狀公  
諱玻字惟器南橋其別號也先世揚州之寶應人始祖  
曰傑當高皇帝時以功授蒲州守禦千戶傳公高祖旭

曾祖鑑陞蘭州衛指揮僉事鑑子深復守禦蒲州故迄  
今爲蒲州人祖澤鑑次子也以蒲庠弟子負授儒官父  
震有淳德州人稱誠齋公母郭氏生公兄弟凡五人公  
其長也公天性孝友爲父母所鍾愛爲諸弟所嚴敬雅  
嗜潔靜而尤好觀古今史籍故雖牽車服賈能以心計  
阜通貨賄而擅其贏然必以義施以燕受其儕輩信且  
懷之賈遊所至址歷甘涼瓜鄯姑臧之境南涉江淮旅  
中疑取決焉爭取正焉退無復私語性凝重不阿人有  
姘媼傾佼者輒面析不能忍而急困極窮若在已焉嘗  
入粟實邊授義官嘉靖某年五月二十一日卒于淮安

旅邸距其生弘治戊申正月三日壽凡若干歲配薛孺  
人生負薛公錦之仲女也母李氏以弘治戊申十二月  
一日生孺人丰度淑閑莊凝績栗相夫子以宜于家事  
舅姑巨細必敬誠齋公夫婦內範孔嚴諸子婦鮮當意  
饗殮組紉凡出孺人手者無所疵焉處妯娌睦馭臧獲  
恩初南橋公計聞孺人慟垂絕確以撫遺女事翁姑自  
誓母黨有欲奪其志者百方終不易也迨伯通生遂鞠  
育之慈惻勤瘁靡夙靡夜甫垂髫即令從塾師于時伯  
通之外舅李公者善教人出其門者率有顯效孺人聞  
之遂手伯通涕泣詣李公教焉伯通幼穎拔祇奉外內

之訓專精淬礪聲名奕奕起比爲弟子負卓然有逸氣  
遂與余輩二三同志共學南亭離經考業朝夕疊疊孺  
人時更僮調之已則大悅其供饋之需器用之備歲且  
再易未有厭焉嘉靖壬子伯通舉于鄉孺人且喜且泣  
若曰吾有以復汝父于地下矣先是姻黨多謂婆室寡  
給子宜從賈者至是乃皆服孺人之知子也嘉靖乙卯  
十二月十三日秦晉地大震孺人遂逝距其生得壽六  
十有八孺人初生二男皆不育嗣子一人楫即伯通舉  
人博文而有奇思將以丕顯于時以衍公與孺人之隱  
烈者未究也娶傅氏引禮舍人弘毅之女繼娶祁氏克

州府同知天叙之女女一人適胡邦靖初公之旅歿也  
公弟瓚自蒲馳赴淮扶其櫬以歸至己酉七月塋韓陽  
祖塋之次迨孺人歿伯通方赴試南宮聞變奔歸更棺  
而殮之權殯東宅越五載爲今歲庚申宅兆既定日月  
叶吉遂遷公柩新城啓孺人之殯奉而合祔焉禮也銘  
曰韓系自周氏于大邦代析而蕃有育淮江矯矯人雄  
荷戈從龍真是世勛于河之東錫胤載烈惟德之揭修  
輟經涂中道而絕婉婉淑人矢心皦日抱哺其嬰茹荼  
若蜜能言而教任冠而室嘗禱有承我心斯畢既孚而  
羽橫翔天路神道可徵中閭作度立孤寔難矧亢其宗



我銘玄宅修于管形

處士李公仲節暨配孺人張氏墓誌銘

李處士公之逝也久矣塋未有銘洎嘉靖三十二年其配孺人張氏卒子邦憲輩將以其月某日啓處士公之壙而合塋焉廼走狀張子以墓銘請公之冢孫女張子之仲弟婦也屬在姻戚不容以固陋辭按狀公諱季字仲節世爲蒲之大通里人曾祖福祖剛考恭妣張氏寔于成化甲午三月二十六日生公公生而醇厚雅尚朴實孝愛慈良出於天性妣張孺人早卒公方幼稚即哀毀不能自存年益長父命商于宛豫之間劑量盈縮善

與時輕重其產遂饒事父暨繼母張孺人悉得其歡心  
靡有間言其後父母歿有叔父母者有子而不能家公  
養之如父母孝敬委曲百端而不得其欲蓋叔父母溺  
愛而私不尤其子不才而謂猶子之養當然也故每事  
必拘挾之囂呶之人咸不能堪公曰叔父母無他此內  
忿其子之不瞻耳遂以所有盡付之鄉鄰有議之者公  
曰吾子而才也奚有於此如不才此亦奚濟至今人稱  
其德量云配孺人張氏明教廂處士俸之女也柔惠而  
慈其事處士公也敬戒必至終身有禮事舅姑則又勤  
孝篤誠飲食必潔晨昏必省處士公遠商家或不給每

出奩具以奉甘旨于是舅姑亟稱之曰賢蓋得于張氏之家教者爲多也余不及見處士公而及見孺人孺人識度弘闊遇事綽有條理議論崑崙然端正不爲依隨其治家也嚴而有恩諸子婦咸憚之中庭無譁撫諸孫恩愛甚至始余弟之議婚也孺人之家方殷盛里俗率視人家之豐約以爲姻婭孺人曰嫁女擇婿耳多貲何爲此其識見顧不甚偉也哉蒲土當秦晉水陸之衝賦役繁重即丈夫之懷閭者弗能支也孺人於諸子遠遊以一婦人而周旋其門戶人莫能欺焉莫能侵漁焉幼婦童孫前後恃之且資識明敏鞠育既衆遂諳于醫理

凡中外幼穉有病咸請孺人視之多有異效他如飲食  
醢醢纂組絲枲亦皆精到于所謂婦德者孺人無不備  
之余得於目覩心竊羨焉客冬余別孺人于家時尚無  
恙也歷夏秋而聞孺人之病入冬而遂聞孺人之訃嗚  
呼悲哉孺人氣厚而體實自幼未嘗事藥餌年雖高其  
氣尚未衰也此宜其耄期未艾而遽若此嗚呼真可悲  
矣子三人長邦憲娶高氏次邦寧娶王氏次邦富娶衛  
氏女一適張邦吉孫男四子華邦憲出子芳子茂子蕃  
邦富出俱幼孫女二一適余弟生負四端一聘薛朝紳  
孺人生于成化辛丑十一月十五日距其卒得壽七十

有三慶士公卒嘉靖丙申二月二十四日距其生得壽六十有三公卒後八年而余弟婚于李氏又十年而孺人亡故張子之知孺人也詳銘曰蒲有李氏肇自宋元篤生哲人矯翰雲騫婉婉淑女作配君子靜好相成德音不已廼既有子亦既有孫庭闈奕奕相映玫瑰惟山之陽惟澗之左雙璧永藏萬年孔安

慶士東山范公暨配孺人王氏柴氏墓誌銘

公諱世達字希哲別號東山蒲之豐樂里人也先世居城東文學庄至公高祖榮始遷白坡下北閭郭之地族姓蕃衍至今稱閭郭范氏云曾祖斌祖清父鸞母寧氏

公家世以農商爲業公幼服賈四方綽有心計個儻負  
大志視行輩遂然競錐刀之末者不屑也令甲權淮  
浙鹺利以佐國計凡商人占淮浙鹽者悉令輸粟甘肅  
寧夏等邊給通關領引而守支于淮浙謂之飛輓然自  
開中以及支給曠日延久且出入戎馬間有烽埃之警  
而鹽利又時有朮胸是以商人不樂與官爲市公獨曰  
此可居也遂歷關隴度臯蘭往來張掖酒泉姑臧之境  
察道里險易計儲峙蓄散盈縮以時廢居而低昂其趨  
舍每發必奇中往往牟大利然又必循理守法如其非  
分非義不以一毫苟取于人于是都御史陳公撫河西

甚加禮遇而諸將軍官咸樂與之納交商中凡有校不以讞官公一言即忻然兩解其信義之孚人者明也又而貲益巨占良田數百畝積緡錢以萬計性雅素不爲衣服與馬之飾而恤匱拯急如恐弗及三原人陳海者貧而坐法公憐其旅困爲之出貲贖梟海德之未幾忽竊公之重貲亡去人皆尤之公曰此人吾與之恩厚偶利遯爾稍寤當自来已而果然于是衆大服之嗟乎此豈與尋常者論尺寸哉嘉靖丁巳九月八日以疾卒于旅距其生弘治戊午九月九日得壽六十公初配王氏孝敬勤儉內外無間言生弘治己未正月二十七日卒

嘉靖乙未三月七日得年三十有七繼配柴氏嚴正有  
則育諸子如已出生正德壬申二月二日卒嘉靖戊午  
正月二十五日得壽四十有七子男二人良志吏部聽  
選官娶齊氏繼衛氏周氏次良吉省祭官娶任氏何氏  
女二人一適國子生甯仲智一適臨洮府同知歷山馮  
公子瀛孫男一守謙孫女一字余弟四象良吉出王孺  
人先塋祖塋良志等為公卜新兆峨嵋之麓擇今歲戊  
午某月某日奉公及柴孺人樞併啓王孺人樞合塋焉  
禮也謂公之履歷不可無誌廼屬余誌而銘之銘曰矢  
義靡遷風被閭廛猗惟公之哲兮仲方是肩貨賄阜通



化瘠為豐猗惟公之猷兮卓鄭爭雄順正是止相爾終始猗惟公之配兮後先齊美負坂之岡河流湯湯爰啓玄堂我銘載揚于德有光萬年不忘

嵎岡王君墓誌銘

萬曆癸酉十月一日嵎岡王君卒距其生嘉靖乙丑八月十五日得年僅四十有五其從子三益方卒業太學聞君訃則奔歸持其喪三益者君仲兄誨子也誨久賈于外三益方九歲即失母君憐而子育之知學為之關鑿延師既冠則為之授室鞠撫甚至三益亦以父事君不啻所生也當君疾篤泣語其伯姊云吾不起必以三

益嗣俾承吾業奉吾妻吾妻方娠幸男也則異日以吾  
產中分之言訖而歿三益既歸皇皇營葬事周爰卜兆  
得地于蒼龍谷西壯王庄之原安厝有日乃持君妹丈  
庠友史君載誼所為君狀匄匍徵銘于余君倜儻不羈  
好從賢士大夫游郡縉紳先生多與君交者余妻亦君  
兄弟行也以姻婭故顧特與余篤余見君神宇壯毅不  
虞其中歲逝也聞三益之請則惻然遂不辭而銘之按  
狀君諱從詒字允正別號媚岡世為蒲之大通廂人曾  
祖彪祖清父容太學生有淳德人稱為省躬公母張氏  
君幼而警慧父母特鍾愛之天性孝友方省躬公夫婦

之違養也君年甚少比長常痛恨歲時享祀必竭誠盡物以為常君諸昆季俱從仲父服賈滄冀率數歲一視家一切家政君皆獨力任之蒲俗嫻黨禮問往來頗繁而徭賦視他郡邑為劇君族既夥又以貲力雄閭右官私諸務最為叢雜君幹濟優裕率不勞而事舉內外大小無不悅之州東五姓湖墾有祖遺田一區百餘年靡穢不治君以其餘力墾闢之畫町疇分阡陌末年歲入至五倍其初蓋又能重本業如此君儀狀甚偉美髯豐頤方腹修幹而性好佳馬每汲汲求之百金不吝既恒有名畜馬嘗壯視諸昆季過燕趙郡國市人無不聚觀

之者善飲好客酒酣輒巨觥縱橫趣致益跌宕有古豪  
達風然好義負氣遇人急困則賙之不復計纖細利至  
于意有不合即顚然見之辭色不能屈也歿之歲其春  
嘗墮馬傷甚余往唁焉則曰祿命家謂我今茲歲行不  
吉邁斯患其殆免夫余寬之曰免矣乃竟不免信命哉  
信命哉君初配羅氏生于嘉靖戊戌七月二十日卒于  
嘉靖乙卯十二月十三日得年一十有八繼張氏凡生  
四子俱不育今有娠女三人一適庠生何汝中封監察  
御史尚仁子二幼銘曰心惟義矣而迹則塵業惟賈矣  
而本則先度胡其宏而胤靡延氣胡其充而不永年匪

命固然其孰使然

虜士東溪徐公暨配張孺人合塋墓誌銘

初東溪公歿子經爲卜兆條山之陰塋焉于時未有銘  
蓋有待也不數歲經罹地震之變張孺人晝夜哭未暮  
心傷死迄今歲辛酉六稔矣子綸擇于四月某日合塋  
孺人公窆廼徵銘于維嗚呼吾又何忍銘公也自維爲  
諸生與公子經遊于時公方壯健意氣慨慨其諸稱論  
甚跌宕因得以闕其中之所藏公潔方好義人也早歲  
失恃事繼母以孝稱長而善治產貿遷南北往來秦豫  
吳會之境者歲必再以故其業滋豐公祇奉諸父雖年

羨至不訾而終始無它腸居貨四十餘年未嘗陰以錙銖自封殖比與諸父析產緡錢且益耗其贏無幾而公又乏私蓄遂大困然公未嘗有怨恨也鄉人義焉方未析產時公嘗挾貲南泛選寇江中諸賈人遭剽刼公適有天幸免焉于是家衆滋生心有端矣或導公托寇稍掩其貲者公曰若然則吾寇也竟不爲毫髮欺公季父山泉公嘗爲予亟稱如此子經幼開敏公教以義方爲之延師授業故經弱冠遊郡庠予甚敬之廼不究厥施橫罹大變而死豈非命哉張孺人慈惠而能家公旅遊率在外久而孺人修中饋畢婚嫁綜藝獲交姻黨無所

紕漏門戶肅如也經歿哭之慟曰吾兒孝子也寧棄我  
比病困猶懵懵如夢語曰經來經來嗚呼茲可謂至悲  
也昔予往來公門屬公家方盛既拜公聆言論亦時獲  
謁孺人于堂然經與維契特篤公宅東有精舍維歲居  
其中者半焉不知其非家也曾未十年而公父子夫婦  
相繼殞謝念昔遊殆異世云故維惜經之志不就而深  
有慟于公也而又不能不爲公銘按狀公諱昂字時望  
元賢徐伯珠後裔始祖徐得洪武中占籍蒲永豐廟高  
祖珍曾祖通祖鑑父憲母師氏公生弘治戊午九月十  
三日卒嘉靖癸丑六月初八日得年五十有六孺人處

士義之女生正德戊辰二月初八日卒嘉靖丙辰八月十六日得年四十有九子男二人經州庠生娶張氏繼李氏卒綸娶沈氏女一人適洪繼芳孫男女凡幾人綸出綸能幹蠱產裕于公存時銘曰噫嘻惟公造產自躬而不處其盈粍秀于子而不享其成將人作簋曾天靡平惟中條之曲有鬱佳城永歸雙壁既固且寧

處士山泉徐公暨配王孺人合塋墓誌銘

公諱杲字宗陽姓徐氏別號山泉相傳爲徐萬戶後裔元時有伯珠者以負外稱爲河中太守高祖得當洪武初占籍蒲之永豐廂曾祖珍祖通父鎰以齒德爲鄉飲



賓母張氏生四子公其季也公天性孝友爲父母所鍾  
愛恂恂承志未嘗有違言家世業商父母慮其不任跋  
涉公毅然以四方事自奮乃遊金陵泝吳越西走隴益  
居貨岐山池陽之域雍涼諸郡稍稍遍歷焉廢居通滯  
能閭時之高下而牟其贏利用能豐殖厥產以慰其父  
母之心公雖業筭緡然心實博愛好義與人交敦重信  
義不爭尺寸利其周急恤病洽于淵黨凡有喪不能舉  
者助之葬有所貰而不能償者折其券故終其身與人  
無忤有餘愛焉性喜儒術常禮重儒者余亡友中軒生  
經者公之諸孫也中軒生業儒而有至行公愛之甚于

孫中軒生之事公尤極孝敬公嘗病瘍中軒生憂于色  
選醫諏方手自製燉藥餌朝夕依侍不去側既而病良  
已余恒見其祖孫間訢訢如也配王氏鄉賓世獻女婦  
道甚修有聲閭巷間先公卒繼配楊氏亦名家女公生  
於弘治戊午十二月八日卒於嘉靖乙卯十二月十三  
日得年五十有八王孺人生於弘治辛酉七月十日卒  
於嘉靖壬午五月二十一日得年二十有二子男一人  
裡王出娶孟氏女三人長適王友諒次適丁成身楊出  
孫男五約綬統俱蚤夭網州庠生娶雷氏紀娶陳氏孫  
女一適兵部武選司員外郎王承休余昔因中軒生識

公雅重公長者初公歿余時自史局丁先妣艱里居裡  
謀葬公徵余爲銘誌迄今二紀餘矣裡乃始克襄公葬  
事介武選執余原稿來以鐫石請余覽之惘然追念今  
昔因爲續增其子姓之當志者貽之其銘曰家以恩聯  
鄉以義親居貨不黷秉德是珍牽車承志南北其軌人  
孚其心異區均美樸貌長裾踉蹌若儒施于孫子惟善  
之趨公歸胡鄉有封若堂千年永固世載其祥

叔父竹川府君暨配孺人李氏左氏合葬墓誌銘  
叔父諱遜齡字伯鶴竹川其別號也遇例授太醫院吏  
目以正德乙亥二月初二日生萬曆庚辰九月二十二

日卒享壽六十有六叔父之卒也維方叅與政樞偕仲  
弟後府都事四端叔父冢子國子生四輔咸在都大人  
以書來訃且以速葬告維未能行廼命二弟星馳西旋  
視殯事因含涕爲銘誌付之俾刻之羨道之石用徵于  
永世云按張氏之先世居解縣池之南有諱思誠者自  
勝國時徙蒲明興其子友直遂占籍通化坊傳仲亨克  
亮秀寧七葉而及大父贈少傅首陽府君誼配大母贈  
一品夫人解氏是生二子大人封柱國少傅岢嵐川公及  
叔父也叔父生始逾朞而大父棄養大母解撫之極慈  
不欲勞以學燕不欲其服賈遠遊年且弱冠未嘗一日

離左右也迨有室始商將吳越間于時年幼氣銳既連  
不獲牟大利乃南歷五嶺抵番禺往來豫章建業諸大  
都會凡六七年而貲益耗窮而歸則大母已沒世矣初  
大父病篤指叔父謂宗戚曰此兒異日憶父與談夢何  
異時大人年十餘慟之後大母嘗嬰危疾謂大人曰吾  
死不恨所慮爾弟不能自立耳大人每念父母言輒噓  
唏不自禁故待叔父極友愛而叔父亦事兄最謹叔父  
性坦率無城府意有所拂輒勃然形于詞色俄而釋去  
故平生無宿怨雖幼事貿遷而視財利甚輕不屑屑較  
錙銖其行化歷久不忘德其寬厚無論所與也比

大人以故市莊爲叔父業每歲夏秋叔父常居莊視耕  
穫故市人多樂就之者莊南王宮谷東崖有高寺一區  
未審創自何時規制宏鉅然歲久僧竄卧佛像榛莽間  
欹棟相與撐拒不任頽簷壞壁甚矣叔父過之惋惜乃  
鳩匠飭材不靳數百金之費一舉而新之雄偉靚麗加  
于初制已復繕器具墾田畝稍稍招還僧徒爲東山增  
一名勝云叔父生平少疾偶以撲跌小青宛轉患風眩  
久之遂成心恙歲餘矣卒之前旬中日忽神情清朗若  
沉痾頓祛者大人方深幸之迺一夕疾作遂不起悲哉  
叔父初配孺人李氏處士鳳朝之女生于正德丁丑十

一月二十一日卒于嘉靖戊戌七月十八日得年二十  
有二淑德無出繼左氏處士錡之女生于嘉靖丙戌十  
二月十九日卒于隆慶庚午十一月十八日得年四十  
有五壺儀甚修能持其家生三子四輔國子生四極四  
德又側室出一子四仲繼梁氏生二子四科四始女四  
孫男二才徵文徵四輔出初左孺人歿業已營壙祔殯  
首陽新兆之次至是啓壙奉叔父并遷李孺人柩合葬  
焉姪子四維謹誌其生卒世行如左而系之以銘銘曰  
惟叔考祖所憐坦不陂義問宣兄弟宜胤緒延越雙淑  
克婉賢原膺膺崇者吁神永藏衍慶綿銘貞石千萬年

明威將軍龍虎衛指揮僉事三弟子叔墓誌銘

嗚呼天之降割我家何若是慘耶昨歲癸未季春先少  
師公棄諸孤于時余叨揔撫寓都去親舍二千里而遙  
二弟五弟咸染疫憫卧不能興惟三弟夙夜吾親左右  
襲含殯殮盡志盡物靡不致其誠信余兄弟終天靡極  
之慟無分遠邇然所無憾于附棺者則三弟是賴耳先  
少師違養之七日而五弟歿越三月而繼妣胡氏隨逝  
迨甲申初改歲而三弟復不祿矣蓋未匝一暮而慟凶  
四罹焉嗚呼天之降割我家何若是酷耶悲哉慟哉余  
與二弟既以仲春爲先考妣安厝勅建新塋遂洎期季



秋啓三弟殯而祔塋于兆次焉余傷弟拮据成家未享  
一日之逸又不忍其生平之善行泯泯也廼枚淚誌而  
銘之弟諱四教字子淑別號歷磐張氏先世鮮梁人勝  
國時諱思誠者自鹽澤之南陂遷蒲是爲蒲之始祖子  
友直遂占籍通化坊傳仲亨克亮以及高祖彥實府君  
琇曾祖孟儒府君寧祖守正府君誼生先考誥封少師  
兼太子太師吏部尚書中樞殿大學士崑川府君允齡  
曾祖祖咸誥贈如先考封云先妣累封一品夫人王氏  
弟生而豐頤廣腹體格整厚神氣充溢眉目間迥與凡  
兒異性和易可親不惟親長愛憐之即童儕亦樂與之

遊終日無誼競年僅十六即服賈遠遊歷汴泗涉江淮  
南及姑蘇吳興之境諸所經紀廢居咸出人意表其器  
度凝重絕無少年子矜溢態旅中無少長咸加敬愛一  
泉馮公遂許以女字之弟幼年飲酒不能消勺至是尊  
長有強之飲者不敢辭衆譁然謂其能飲觥籌交錯終  
席不爲苦自是後凡有飲宴輒以善飲詘其一座中斯  
亦善矣已而從先君居業滄瀛間識量益宏達綜計精  
確不屑屑較錙銖每年羨于人所不取充精九筭術  
凡方田粟布勾股商分等法塵中有白首不得肯綮者  
弟皆按籍妙解不由師授旅黨或財賄分合糾紛難叙

者率請弟爲決莫不犁然兩解彼此稱平焉癸丑余登第後迎先君養京邸遂悉以生計付弟是時家用益浩穰中更家鄉地變滄鹺復壅滯弟極力周旋用能不至困乏營給中外以慰先君之心然滄蒲相去千餘里利輒所羈率數歲不獲一歸弟壯未嗣余諗之先君乃移弟挈天津以居時嘉靖己未歲也弟治業滋久諳于東方鹺利源委分布調度具有操縱末年業用大裕不啻十倍其初乃其襟度曠達樂施好義當其意氣所激即揮置千金不顧視旅中齷齪計刀錐者不侔也每歲時候余都中談及所有事其言度材任人相時應機之畧

井井然咸有當于政理余甚惜以弟之才具而終身塵井間也會有工部例乃入貲授龍虎衛指揮僉事弟雅有離俗高致頗留心鍊氣養神之術時從方外人遊嘗告余曰人之生世貴適其性情且逐逐市囂中何爲者弟將西歸鄉園奉親暇則拉朋舊縱情山水間一洗胸中俗累豈不快與余時有意丐閒聞之不覺喟然太息萬曆辛巳弟遂携孥歸蓋自巳未至是二十餘年子女皆東產遂皆作東人音云親舊聞弟歸喜相慶慰往來讌會蓋終歲不絕乃爲子女理婚嫁尋奉先君命更繕宅第甫畢工而先君棄養矣悲慟勤勞見者感動余之

聞先訃奔歸也中途患腋癰比抵舍脛瘠失形氣息僅屬弟憂形于色朝夕扶慰甚至方相與總總治先人塋事惟日不足嗚呼詎憶弟竟不及期而先逝耶悲哉悲哉弟秉受素壯自幼寡疾病四旬後常感時疾勞復至再元氣雖虧損不復然精健猶視余倍之商遊既倦擬歸息于家廼變故相仍益鞅掌牽世累性謙謹好禮不欲有踈節于鄉故吉凶慶吊遠近皆躬致之由是心與身兩不自適神用漸耗入冬余見弟色不澤慮之強省事而弟心不能已也歲暮弟卧疾經旬初甚困有瘳矣會舉五弟喪欲出送衆強止之則撫榻大哭疾遂革

嗚呼果命也耶果非命也耶以弟之孝友仁恕積德不  
懈而竟止是耶數月來弟每與余商確先人既歿所欲  
爲將來門戶計宏遠周至并其意向諸所規建磊磊皆  
閱鉅其志趣軒舉絕無偷語不似臨末景人而咄啐至  
此故憫憫謂弟未可死幾欲問天而靡從也悲哉弟生  
嘉靖庚寅十一月初十日卒萬曆甲申正月五日得壽  
五十有五配馮氏子男一人善徵娶辛氏女一人適郡  
庠生郭里塋之日爲九月十七銘曰冲思毓玄堅束于  
世緣牽車窮年成功未息肩德則多而福應則鮮受則  
厚而筭則弗延難詰者天孰測其然爰關重泉從考新

阡永世有辭貞石是鐫

太學生五弟子易墓誌銘

嗚呼先妣贈一品夫人凡生七男子悉自乳弟行在五  
自余至弟每間歲一生前後僅十年耳于時遭家中否  
先妣隻身操井臼上奉孀姑下提携棒負諸稚鞠哺訓  
育浣故緝敝每質明興中夜寢以爲常七子中其最少  
二人早殤及五人者皆壯有室家日嚮裕而先妣不待  
養乃余兄弟終身永恨然幸先考封少師府君在堂爲  
子若孫依恃耳比四弟不祿先少師哭之慟今春蒲郡  
大疫閭室染焉先少師遂棄諸孤越七日弟隨逝嗚呼

悲哉慟哉家門之禍尚忍言哉先妣夫人拮据育諸子  
今惟余在長三人在耳歲律且易奉勅建先少師塋兆  
未竣卜以十二月二十五日先治弟殯余乃爲誌其墓  
中之石用徵久遠感憶今昔不覺心神之摧越也悲哉  
弟諱四象字子易號松磐張氏先世蓋居解梁鹽澤之  
南其徙而之蒲則自八世祖思誠始傳友直仲亨克亮  
以及高祖彥實府君諱琇曾祖孟儒府君諱寧祖守正  
府君諱誼先考崑川府君諱允齡自曾祖而下三世皆  
誥封少師兼太子太師吏部尚書中極殿大學士先妣  
王氏贈一品夫人弟生而穎茂言動嬉笑咸機警與常



見異授之章句輒能誦且強記時先考方服勤四方余兄弟咸在塾先妣稍稍以家務付弟理即釐然有條緒不啻若成人者遂令輟學業治生計焉比弟年益長家務益浩穰弟心時時在舉子業迄不得專精攻治嘗爲弟子負尋授例卒業成均心歎然以爲恨也性喜博涉凡百家言一見即能語其大意好爲楷書方正道媚得二沈餘韻間操觚爲詩頗能自道其胸中意出且遇事多能不由于學素未治田業及先少師建孟盟莊弟調度耕菑畝量畝即老農圃有不逮者至于禾稼之豐瘠果疏之登耗類能逆覩而預計之比獲不失升勺尤

善奕蓋得之天性其襟度夷曠飲酒至斗餘不亂當其  
意興所至觥籌交錯或至夜分衆酩酊不支而獨高談  
自如樂易無崖岸所與交游最廣友誼最篤人有不給  
或偶值意外困阨惻然赴而賑之惟其力不計也春初  
弟貽書於余謂將以先少師壽誕後赴來候余余關館  
溪之俄而聞先君訃且聞弟病及家人得弟函問以余  
毀頓故秘不聞也歸及湖城始聞之嗚呼慟哉弟氣稟  
素壯且少余十年余來自覺早衰方賴弟顧余餘齒  
而弟乃遽至是耶悲哉弟生于嘉靖乙未十一月二十  
日卒于萬曆癸未三月二十九日享年四十有九初聘

王氏生于嘉靖癸卯十一月初七日卒于嘉靖乙卯十二月十三日得年一十有三娶范氏生于嘉靖己午二月二十九日卒于萬曆丁丑正月二十五日得年三十有二繼娶景氏子男一麟徵女一初范氏歿塋祖塋弟爲治墳甚精茲以時月之吉啓墳合塋併迎王氏柩自王塋來祔焉禮也銘曰賦之慧也充其量何藝不研受之龐也善其養何筭不延胡造物者顧靳其後不究其先曠達世緣德施澶漫從考而還祔祖斯阡既安永堅于千萬年